



*Iesus aduertty par sa mere la Vierge ; changea l'eau en vin aux nopces en Cana ,
où le vin estoit failly.*

LE troisiéme iour apres que S. Iean eut donné témoignage aux Iuifs que Iesus estoit le vray Messie , on faisoit des nopces en Cana de Galilée , où Iesus auec sa mere & ses Disciples furent appelez ; la Vierge voyant que le vin estoit failly , en aduertit Iesus , craignant que scandale aduint au banquet , & que les conuiez murmurassent contre l'Espoux , pour n'estre point honnestement traittez ; A quoy Iesus répondant dit , Que n'importe-t'il , & à vous femme ? mon heure n'est pas encore venuë. Sa mere dit aux seruiteurs , Faites ce qu'il vous dira. Iesus leur dit , Emplissez ces cruches d'eau , & ils les emplirent ; il en fait porter au Maistre d'Hostel , qui ayant gousté de l'eau changée en vin , sans sçauoir d'où cela venoit ; (bien que les seruiteurs qui auoient tiré l'eau le sceussent) appelle le maistre , & luy dit , Tout homme met le bon vin le premier , & puis le pire apres ; mais toy tu as gardé le bon vin iusques à maintenant. Iesus fit ce commencement de signes en Cana ville de Galilée , & demonstra sa gloire , & ses Disciples creurent en luy.